

明  
詩  
紀  
事

明詩紀事

貴陽陳田輯

丁鑑

沈周 三十六首

周字啟南長洲人景泰中以賢良薦辭不赴有石田

集十卷

四庫總目周以畫名一代詩非其所留意晚年畫境彌高頽然天放方圓自造惟意所爲詩亦揮灑淋漓自寫天趣蓋不以字句取工徒以棲心邱壑名利兩忘風月往還煙雲供養其胸次本無塵累故所作亦不調不琢自然拔俗寄興於町畦之外可以意會而不可加之以繩削其於詩也亦可謂教外別傳懷麓堂後葉石田寄意林壑博涉古今圖籍以毫素自名筆勢橫絕復出蹊逕片楮正練流傳遍天下情興所到或形爲歌詩互以相發鮑翁家藏集石田古今諸體各臻其妙溪風渚月谷

平鑑卷十一

鵲岫雲形蹟若空姿態倏變玩之而愈佳攬之而無盡所謂清婉和平高亢超絕者兼有之

王鑿震澤集石田作繪事峰巒煙雲波濤花卉鳥獸蟲魚莫不各極其態或草草點綴而意已足成輒自題其上時稱二絕

懷星堂集公壯歲詩純唐格後更自不足卒老於宋悉索舊編毀去後學者皆不知此余爲惜之

甫田集先生詩初學唐人雅意自傳既而師眉山爲長句已又爲放翁近律所作莫不合作然其緣情隨事因物賦形開闔變化縱橫百出初不拘拘乎一體之長

南濠詩話沈先生啟南以詩豪名海內而其詠物尤妙予少嘗學詩先生如詠門神云檢兩功名惟故紙傍誰門戶有長情楊花云借風爲力終無賴與水何緣卻託生又嘗作落花詩云美人天遠無家別逐客春深盡族行不拘拘題目而亦不離乎題目茲其所

以爲妙也四友齋集視余至姑蘇在衡山齋中論及石田之詩因先生但經意寫出意象俱新可謂妙絕一經改削便不能佳今有刻集往往不滿人意因口誦其率意者二三十首即余所見石田題畫詩甚多皆可傳詠與集中者如出二手乃知衡山之論不虛也

丹青志沈周繪事爲當代第一山水人物花卉禽魚  
悉入神品其畫自唐宋名流及勝國諸賢上下千載  
縱橫百輩兼總條貫莫不攬其精微每營一障則長  
林巨壑小市寒墟高明委曲風趣洽然使夫鑒者若  
雲霧生於屋中山川集於几上視眾作眞培塿耳一  
時名士如唐寅文璧之流咸出龍門往往致於風雲  
之表信乎國朝畫苑不知誰當並驅也  
六硯齋筆記沈啟南才情灑落見於所作畫上題語  
想其一時滿志氣酣神縱不知其工也如賦簾影云  
誰放春雲下曲瓊一重薄隔萬重情珠光蕩日花無  
語疏影通風笑有聲外面令人倍惆悵裏邊容眼自  
分明知無緣分難輕入敢當楊花燕子爭情思駢名  
如少年不自持者夷考公生平篤行乃知是廣平梅  
花耳  
六硯齋二筆沈石田小幀四時山水倣北苑筆在烏  
戌人家題句亦甚豪邁中原七子輩談詩謂啟南本  
富詩才而以題畫取辦倉猝故遂入別調此猶答張  
旭縱酒吳生塗鬼致筆蹤狼藉也可笑沈詩曰紅滿  
枝頭綠滿湖水邊人影夕陽孤春波消雪三千頃  
與溪翁作酒壺雪壓高居玉樹中曉來寒栗不禁風  
村沽急辦雙饌碧卯飲聊充兩頰紅長竿不屬忙人  
弄要自閒人管領之釣月哦風一般趣黃塵沒馬是

何時湖上新晴宿雨收平頭舫子貼天遊瘦尊容得  
三千斛大醉去題黃鶴樓又十年前余購得石翁奇  
畫一軸幅闊二尺有咫高六尺作翠峯橫天僅分兩  
聚下略露陂麓列樹五株四直一偃對岸兩松亭亭  
中虛三尺餘蓋是雲氣湧鬱挂之屏几間蒸然欲浮  
屋也神來之妙如此翁亦極滿志題句云翠倚高天  
玉出奇淋漓元氣太陰垂匡廬嵩少憑君指醉裏狂  
揮醒不知  
扣舷憑軾錄姑蘇沈啟南嘗有詩題趙子昂畫馬云  
隅目晶熒耳竹披江南流落乘黃姿千金千里無人  
識笑看胡兒買去騎李文正公亦有一絕云宋家龍  
種墮燕山猶在秋風十二閑千載畫圖非舊價任他  
評品落人間二詩之意皆惜子昂事元之非也  
夷白齋詩話王文恪公鑒自內閣歸時石田先生病  
亟遣人問之答詩云勇退歸來說宰公此機超出萬  
人中門前車馬多如許那有心情問病翁字墨慘淡  
難識遂爲絕筆後二日而卒今集中不載  
畫禪室隨筆石田先生於勝國諸賢名蹟無不摹寫  
亦絕相似或出其上獨倪迂一種澹墨自謂難學蓋  
先生老筆密思於元鎮若淡若疏者異趣耳  
筆精沈啟南畫入神品而詩亦清真可咏不必觀丹  
青水墨詩亦可當生絹粉本也

曹履吉博望山人稿石田翁畫多用退筆中鋒作小  
斧劈當是以意少變北苑而其源則實出巨然僧梅  
道人蒼鬱秀潤併極出藍之妙  
張丑清河書畫舫明畫學自劉廷美開山之後當推  
沈啟南爲廣大教化主如唐子畏之清真文徵仲之  
古雅足可南宗北派也  
孫承澤庚子消夏記嘗見石翁題畫有絕佳之詩而  
集中俱不載安得有心人肯大爲搜羅以成快編也  
田按明四家畫稱沈文唐伏白石翁畫詩均是蒼堅  
一派惟畫神明模範深入董巨之室詩則不受拘束  
吐詞天拔而頽然自放俚詞調言亦時闌入然其奇  
警之處亦非拘拘繩墨者所能夢見也畫家有粗文  
細沈之目余見翁和香亭圖工細絕倫洵稱合作獨  
惜十洲不能詩未免有彭淵材之恨耳

### 圖錢氏沁雪石

齋前峙奇石兀可當一障沁此萬古雪互地氣魄壯蒸處勢  
欲軒得月神更王妙擬軼伏池闊未下雪浪冽鑿天借巧胸  
次具洞蕩孤立宜有鄰惟許修竹傍風雨不敢泐刻名久無

恙寶此一夔足礪礪不多尙貞德充配玉白衣可呼丈我見  
便欲拜良信米弗訐聊與貌高古敢有愚公安

潤色舊臨倪雲林小景

倪迂戲於畫簡到更清臞名家百餘禩所惜繼者無況有沖  
淡蕭數語弁小圖吳人助清玩重價爭沽諸後雖有學人紛  
紛墮繁蕪崔子強我能依樣求葫蘆墨澁不成運林慙澗與  
俱醜惡正欲裂捲去不須與今夕秋燭下載見眼模糊妄意  
加潤色泥塗還附塗崔子豈不鑒愛及屋上烏

七星檜

海虞七星檜宜爲羣木冠列生老子宮與邑作奇觀廣壖氣  
蕭森入門凜欲汗久信天地成沃知雨露瀦傳值從蕭梁其

說我恐漫驗斗形叵全七既斃其半三株寔聊存難執歲月  
算各各具一異形容匪詞翰西體裂多藁豁然敞三判東體  
活亦裂筋骸互續斷北者崕而禿袖破舞脫腕葉亦不暇葉  
榦亦不暇榦左文皮索絢孤絕頂留繖搓折象齒蹺癭決鬼  
目爛疏越復叢穴骹骹仍軒岸蛟孿及猊跛努力不得盪矛  
長及劒短接戰驚楚漢如此紛怪駭肝君不能按知遭幾雷  
厄還屢兵火難生死付冥然造物反被玩君子重貞固頑醜  
小人調緣高坐吹簫我欲呼鶴鶴從根覓薤丹澆泉覬紅燦  
長生就其蔭永作婆娑伴

田按石田有虞山古檜圖卷藏江村高氏江村云水  
墨作虬枝三林蒼古屈曲誠名品也石田自題云虞  
山至道觀七星檜相傳爲梁時物今僅存其三餘則  
後人補植者而三株中又有雷震風擊者尤爲詭異



真奇觀也暇中與子靖史永齡往觀焉永齡因請圖  
之歸此詩亦附書於後卷後又有吳興張淵詩云虞  
山老檜三株青斗壇半掩招搖星道人丹成化鶴去  
三檜天矯飛龍形是誰手植經千載曾見昭明讀書  
在幾回天上葬神仙不獨人間變滄海古人今人繞  
樹行古今人去樹長生乃知勁氣合元化不與凡木  
爭枯榮長洲老石好奇者百里攜杯游樹下浩嗟天  
下有樹此樹無我去此樹何人圖三日經營雙眼力  
滿空蒼翠移真迹鶴骨虬筋左紐文雷裂霜皴古秋  
色日暮袖歸歸不得滿山風雨山靈惜居然題與臥  
雲人長嘯寒風生石壁於乎石君詩畫天下知此筆  
尤爲天下奇勸君風雷當掩戶恐化蛟龍擊空去

### 題畫

黃鶴磯頭秋水落故人藉地相逢著十年短鬢話吳霜是非  
不暇論城郭楚江萍實待誰嘗老矣吳儂思故鄉

### 題趙子昂重江疊嶂卷

王孫本號松雪翁能事錯認營邱公丹青隱墨墨隱水其妙

貴淡不數濃繁難曲瀨導巴蜀沓嶽長巒連華嵩空蒙野馬  
軋雲日浩蕩碧縠吹秋風王孫隔此不可從水晶雙闕金芙  
蓉招之千年或一出黃鶴豈不思江東

朱澤民山水

睢陽老人營邱徒意匠妙絕絕代無爲留清氣在天地便就  
片紙開江湖長松落葉風細細幽構繁蘿倚江住壁虎書魚  
蕩水光老屋疏茆通雨氣老人不歸空北山芳杜春風應厚  
顏微官縛人萬事拙安得浮雲相往還宦海黃塵迷白髮雲  
壑風泉清入骨思家看畫方兀然叫落西窗子規月

王右丞江干雪意圖

城中十日暑如炙頭目眩花塵土塞僧樓今日見此卷雪意

茫茫寒欲逼古井修柳枝裊矯下有幽篁厠叢碧隔溪膠艇  
不受呼平地塞清無人迹西風翻鴉忽零亂遠雁迷雲猶噤  
噤筆疏墨淡精神在收閱千年若完壁宛然一段小江南三  
遠備全能事畢維名依稀半未漉老眼再摩初認得所存只  
是天假借倒囊定應無吝嗇錦標內帑固自有人間間出鳳  
五色老余尺素見雪渡草樹凌競人跼蹐僅有溪山不盡意  
何如此圖長數尺太邱孫子具法眼鑿壁收藏珍襲百我將  
拙語敢印證聊寫心知并目識

贈天香李公子

戚畹佳公子天香玉雪標桓伊教弄笛秦女合吹簫酒或談  
三略詩多弔六朝屏風倚春醉花鳳紫金貓

過簡書記故寮

一寮峰絕處一衲一吟身忽爾有生內寂然無此人風翻破  
經卷雲護舊牀茵只有青山在如如似佛眞

拂水崖

只有青山是勝緣青鞋布襪且輕便天收雨腳賒今日我趁  
花時遣老年絕壁雲扶將墜石豁崖風勒下奔泉此來不憤  
空歸去旋構新篇揀竹鐫

從軍行

馬上黃沙拂面行漢家何日不勞兵匈奴久自忘甥舅僕射  
今誰託父兄雲外旌旗娑勒渡月中刁斗受降城左賢早待  
長繩縛莫遣論功白髮生

無酒

山桃亂開紅欲然我宜賞之無酒錢十常九事意不愜百又  
五日春可憐誰家竹葉賒爛醉滿眼花枝笑醒眠何消苦苦  
仰司業便可燒茶隨玉川

張伯雨墓

靈石山頭生紫煙高墳遺蛻尙依然已知鴻寶隨人祕猶有  
鵝羣與世傳幢影翠搖巖畔竹佩聲寒瀉月中泉古杭城郭  
東來是應識先生化鶴年

倣雲林筆贈吳瑞卿

山中地貴無錢買水次幽居卻盡強潦草杯盤無俗客清虛  
亭館但湖光弱雲過雨不多點高木當風有許涼一咏一觴

聊遣接自家錯認是柴桑

笠澤

東南魚鳥地堪與清苕比我把珊瑚竿期誰弄雲水

磧沙寺

古殿瞰清湖高幢標碧樹聞有注詩僧欲覓今何處

睡起小酌

黃鸝啼破粉牆東簾幕深沈日日風起喚酒杯尋一醉春愁  
打破落花中

送周桐村

看到梅花十萬株清吟一月住姑蘇城中屏幃都題遍施與  
吳人百斛珠

西湖竹枝詞

妾在船頭偷看郎郎騎白馬好風光錦樣荷花三十里中間  
一對紫鴛鴦

題劉完菴畫

天涯纔見一人還僧寺來偷半日閒勘破十年塵土夢畫中  
不寫晉陽山

夏太常爲仲和寫竹

寫玉仙卿老更工墨池生雨又生風謝安老去羊曇在十載  
瀟湘似夢中

方方壺畫

琵琶嶺上丹經熟海岳庵頭墨法眞草樹依然黃鶴遠江南

思煞未歸人

次東原先生與其甥魏公美詩畫韻

蒼蒼筆力似荆關  
白髮圖書老不閒  
未許羊曇乞西墅  
畫中分與舊溪山

韜光庵

峰巒曲密松杉暗  
臺殿高低紫翠迷  
遊屐到門清梵歇  
杉籬飛上樹頭啼

用張外史韻題明公山水

看雲側逕青藜杖  
映月方牀白氍袍  
不管果園山鳥食  
小童隨地拾殘桃

聞歌憶王畏齋



風流文采今誰似到處春遊有所思千樹垂楊一黃鳥清歌  
疑在習家池

題畫寄吳汝輝

沿溪不斷樹交花草淨漚明處處沙七尺瘦藤扶一老緩隨  
流水問山家

牡丹

花好何須爛漫開一枝紅玉見重臺東風莫便相搔觸要盡  
臨軒三百杯

題畫

先路未須雙白鶴扶衰還要紫藤條松陰水影淡如鏡照箇  
詩翁過野橋

題畫與繼南

柳條低妥水容淨燕子亂飛花事忙芳草日長春似盡有人  
將夢落池塘

題畫

浦樹冥冥綠未齊雨晴泥滑鷓鴣啼相思不見江南客一曲  
竹枝春日西

題畫

百疊春山百疊溪人家分住水東西賣魚鼓響日未落一對  
野禽穿竹啼

題畫

風和楊柳初偷眼雨怯桃花未放心且載一壺江上酌綠波

春酒共沈沈

題畫

番番花信是狂風到處園林掃欲空  
正賴東君作姑息薄留紅豔伴衰翁

畫楊梅答韓克瞻

西山有雨楊梅熟東老無詩口舌乾  
珍重故人知此意高林摘寄紫瑛丸

題畫

水次人家似瀼西參差竹樹路俱迷  
溪翁兀坐不出戶日午飯香雞正啼

文徵明

三十四首

徵明初名璧以字行更字徵仲長洲人用薦授翰林

院待詔有甫田集三十五卷

四庫總目徵明與沈周皆以書畫名亦竝能詩周詩揮  
灑淋漓但自寫其天趣如雲容水態不可限以方圓  
徵明詩則雅飭之中時饒逸韻  
藝苑卮言文徵仲詩如仕女淡粧維摩坐語又如小  
閣疏窗位置都雅而眼界易窮  
讀書後余嘗謂吳興趙文敏公孟頫風流才藝惟吾  
邵文待詔徵明可以當之而亦少有差次其同者詩  
文也書畫也又皆以薦辟起家趙詩小壯而俗文稍  
雅而弱其淺同也文皆暢利而乏深沈其離古同也  
書小楷趙不能去俗文不能去纖其精絕同也行押  
遯也入分古隸則文勝小篆則趙勝也書則文復少  
隸畫則趙之入唐宋人深而文少淺其天趣同也其  
鑒賞博考復同也位在趙至一品而文僅登一命壽  
則文踰九齡而趙僅垂七袞異也若出處大節之異  
前輩固已紛紛言之吾待詔不與同年語也  
四友齋叢說衡山嘗對余言我少年學詩從陸放翁  
入門故格調卑弱不若諸君皆唐聲也

國雅文徵仲吳中往哲如公之博鑒雅步藝苑者宜  
冠林壑矣其文恬寂整飭詩亦從實境中出特調稍  
纖弱其字法畫品尤得三昧故是一代逸品  
夷白齋詩話衡山文先生有病起遣懷二律蓋不就  
甯藩之徵而作也詞婉而峻足以拒之於千里之外  
詩云潦倒儒官二十年業緣仍在利名間敢言冀北  
無良馬深愧淮南賦小山病起秋風吹白髮雨中黃  
葉暗松關不嫌窮巷頻同轍消受爐香一味閒經時  
臥病斷經遇自撥間愁對酒歌意外紛紜如命在古  
來賢達患名多千金過驥空求骨萬里冥鴻肯受羅  
心事悠悠那復識白頭辛苦服儒科後甯藩敗凡應  
辟者崎嶇萬狀公獨晏然始知不可及也  
六硯齋二筆文衡山先生詩有極似陸放翁者如煮  
茶句云竹符調水沙泉活瓦鼎燒松翠竄香吳中諸  
公遣力往寶雲取泉恐其近取他水以欺乃先以竹  
作籌子付山僧候力至隨水運出以爲質可補茗社  
故實  
烏衣佳話蘇郡虎邱劍池其水不流終歲不竭正德  
辛未水忽涸其下嵌岩空洞深邃莫測好事者執燭  
而入見內有疊板如門戶狀相傳閩閩王所葬處文  
衡山詩云吳王埋玉幾千年水落池空得墓顚地下  
誰曾求寶劍眼中吾已見桑田金鳧寂寞隨塵劫石

關分明有洞天安得元之論往事滿山寒日散蒼煙  
越歲其泉復舊

黃佐泰泉集文公於書未嘗苟且或答人簡札少不  
當意必再三易之不厭故愈老而愈精妙有細入毫  
髮者李文正公東陽以篆自負及見公隸曰吾之篆

文生之隸蔑以加矣  
書史會要待詔小楷行草深得智永筆法大書做范

翁尤佳評者云如風舞瓊花泉鳴竹澗  
謝肇淛五雜組文徵仲書得法於懷子山而參以松

雪亦時爲黃米二家書然皆非此公當行惟小楷正  
書卽山陰在世亦當虛高足一席畫遠學郭熙近學

松雪而得意之筆往往以工緻勝至其氣韻神采獨  
步一時

丹青志文先生畫師李唐吳仲圭翩翩入室大圖小  
軸莫非奇致海宇欽慕纖素山積墮溢里門寸圖縱

出千臨百摹家藏市售眞贋縱橫一時硯食之士沾  
脂泥香往往自潤年齡大耋神明不凋斷煙殘楮簪

燈夜作故得者益深保愛奉如珪璋  
畫禪室隨筆文太史本色畫極類趙承旨筆微尖利

耳同能不如獨異無取絕肖似所謂魯男子學柳下  
惠

畫史會要朱子明爲衡山高足衡山應酬之作多出

子助手金陵一人客寓蘇州遣童子將幣於子助求  
衡山贗本童子誤送衡山宅致主人意衡山笑而受  
之曰我畫真衡山聊當假子助可乎一時傳以為笑  
方薰山靜居畫論衡山太史書畫辨香松雪筆法到  
格駿駁乎入吳興之室矣然自有清和閒適之趣別  
廠逕庭亦由此老人品高潔所至  
東泉詩話甫田集戊午元旦一律勞生九十漫隨緣  
老病支離幸自全百歲幾人登耄耄一身五世見會  
玄祇將去日占來日計謂增年是減年次第梅花春  
滿月可容愁到酒樽前集中多有元日除夕等題衡  
山大年幾至百歲王弇州為作傳云海內習文先生  
名久幾以為異代人而怪其在謂為仙且不死情事  
逼真  
田振衡山詩弇州輩勸以吳歛少之余謂和平蘊藉  
於風雅為近奚必以模宋範唐自矜優孟衣冠耶書  
畫亦精絕過人為世寶重名德大年林見素王宗賢  
於藝事外推之可稱具眼

道出淮泗舟中閱高常侍集有自淇涉黃河十二首次

其韻錄二

揚舫入淮泗春雲去閑閑彭門在何許仰見雲龍山逝矣黃  
樓人清風邈難攀坐令千載輕宇宙俛仰間

渚蒲十里青隄柳千絲直行路尙裏凄忽忽徂春色暑寒有  
恆期人事無能測魚鳥獨會心忻然似相識

次韻九達隔雨

飄風終夕號客子念明發愁聞雨蕭蕭況聽泥滑滑流潦失  
牛馬春雲暗城闕昨日青楓根已逐沙痕沒不堪行路憂中  
夜生華髮四月尙重裘怪事吁可咄慌忽夢吳江香麝薦春  
鰕非關重土思遠道心迫卒

三城王折枝桃花圖

彤宮雨晴春婉婉妍華不隔深庭院試拈丹粉弄春韶淡痕



已破東風面醉肌暈碧曉生光脈脈閒情眉斂黃不從徐史

爭新格自有湛然宮樣粧

世謂滕王元嬰善畫花鳥蛺蝶而董道獨以爲勝王湛然

田按三城王朱芝坭唐定王子也畫史會要稱王精繪事所作耆英王母九老百花諸圖妙絕一時此幅設色桃花徵仲及石田枝山昌穀諸公題詩詞致楚附錄於此石田云王孫好文謝裴馬日影宮牆照彤瓦鈴齋晏坐春融融過牆小桃新可寫牆頭斜亞一梢紅纖毫寫春天無功露華半溼嬌靨笑金母西來呈木公枝山云冶芳作春春不語海發生情浩無主半梢小出天池間萬木千條面如土粉含醉痕無賴紅倚嬌相擁嫁東風幽香返魂妃子活恨銷不盡還重重昌穀云新桃倚牆青破勢白日探宮春漠漠纖毫聊爲發丰姝隔簾小枝顏色薄深朱倩蠅粉借姿露靨含嬌額半垂宮娃捧硯驚香豔羞對東風還自悲

暮春齋居卽事

閒庭青草積春半思蒼茫小雨作寒食微風汎海棠芳情經

病減白日廢書長何物供歆枕繁簾一炷香

獨坐

獨坐茅檐靜澄懷道味長年光付書卷幽事續爐香日出鳥  
烏樂雨收花竹涼蕭閒習成懶不是寡迎將

東禪寺

古寺謝車馬清臨綠玉灣雙禽啼竹徑獨犬獲松關葉落秋  
滿地夕陽僧自閒偶來還自去回首碧雲間

餅梅

斷枝黏碧蘚殘蕊疊冰紈未乏溪山韻尤宜几格看移燈傳  
壁影垂箔護春寒應斷西湖夢東風在席端

四月

春雨綠陰肥。雨晴春亦歸。花殘鶯獨啞。草長燕交飛。香餽青  
綰扇。筠窗白葛衣。拋書尋午枕。新煖夢依微。

上巳日獨行溪上有懷九達

郭外青煙柳帶柔。洞庭西去水悠悠。故人不見沙棠楫。燕子  
齊飛杜若洲。日落晚風吹宿酒。天寒江草喚新愁。佳期寂寞  
春如許。辜負山花插滿頭。

野亭秋興

斷雲狼藉近簾櫳。天地蕭條四壁空。盡日倚闌黃葉雨。一番  
吹鬢白蘋風。年光搔首孤鴻外。山色供愁落照中。欲寄閒情  
無那遠。煙波江上採芙蓉。

寄金陵許彥明兼簡王欽佩

宮樹飛霜謝玉柯。秋懷應屬許。渾多寒城自映秦淮月。游女  
新傳子夜歌。別後風煙勞悵望。歲殘消息定如何。官忙爲問  
王司馬。能放晨衙幾度過。

次韻答子重新春見寄

樽酒離懷強自開。長歌宛轉勝悲哀。梅花不與春光在。茅屋  
相將燕子來。十日殘寒風約雨。一痕新綠水生苔。相思忽唱  
江南曲。白芷含香取次裁。

石湖

石湖煙水望中迷。湖上花深鳥亂啼。芳草自生茶磨嶺。畫橋  
橫注越來溪。涼風嫋嫋青蘋末。往事悠悠白日西。依舊江波  
秋月墮。傷心莫唱夜烏栖。

天界寺

城南寶刹舊稱雄  
晉代莊嚴在眼中  
絕壁星辰連閣道  
上方龍象湧珠宮  
翠圍嵐岫層層雨  
涼入松杉院院風  
身世茫茫塵土滿  
欲依蓮社住江東

病中懷吳中諸寺

七尺藤牀一畝宮  
青山何處不相容  
大官底用三升酒  
長樂愁聞五夜鐘  
笠澤風煙荒橘柚  
橫塘秋色老芙蓉  
幾時歸去楞伽寺  
常伴林僧看古松

治平寺寄聽松

久客懷歸問舊遊  
雙娥精舍屋東頭  
絕憐近寺無塵到  
曾是尋僧竟日留  
滿地綠陰誰結夏  
擁籬黃葉更宜秋  
玉泉清冽應無恙  
憑仗山廚設茗甌

負幢寺寄石寫

搔首長安望闔閭風煙漠漠九秋餘正思黃葉南朝寺忽把  
飛雲慧遠書東壁磨崖知有待北窗懸榻竟何如自憐白首  
無神補虛棄閒緣臥直廬  
昭慶寺寄守山

感懷

三十年來麋鹿蹤若爲老去入樊籠五湖春夢扁舟雨萬里  
秋風兩鬢蓬遠志出山成小草神魚失水困沙蟲白頭博得  
公車召不滿東方一笑中

田按何元明四友齋叢說云衡山先生在翰林大爲  
姚明山楊方城所窘時昌言於眾曰我衙門不是畫  
院乃容畫匠處此惟黃泰泉馬西玄陳石亭與相得  
甚歡二人只會中狀元更無餘物衡山數公長在天  
地間今世豈更有道著姚涞楊維聰者耶玩此詩意  
元明之說非虛矣衡山又有句云青山應笑東方朔  
何用俳優辱漢廷

寄許仲貽

問訊幽人白下蹤，若爲清世不相容。  
幾回對月思玄度，安得披雲見土龍。  
落日橫塘折楊柳，秋風南浦夢芙蓉。  
相思滿目煙波遠，吟得新詩手自封。

龍門覽勝圖

三月韶華過雨濃，煖蒸花氣白溶溶。  
菜畦麥隴青黃接，雲岫煙巒紫翠重。  
一片垂楊春水渡，兩崖啼鳥夕陽松。  
晚風吹酒籃輿倦，忽聽天平寺裏鐘。

雨窗戲墨

一雨垂垂春欲徂，弱雲狼藉草紛敷。  
池塘水滿魚爭躍，竹徑泥深鳥亂呼。  
暝色排檐失昏旦，涼聲入枕夢江湖。  
山齋十日

經過斷榻得南宮水墨圖

倣北苑山水

青山隱隱水漪漪  
映樹蘭舟晚更移  
一縷茶煙衝宿鷺  
無人知是陸天隨

倣雲林筆

遙山過雨翠微茫  
疏樹離離挂夕陽  
飛盡晚霞人寂寂  
虛亭無賴領秋光

題畫

一重山崦一重溪  
猶有人家住水西  
行過小橋回首望  
焙茶煙起午雞啼

咏堯民案上盆蘭



渺渺微風約珮環楚江清落研屏間美人不見瑤琴歇一卷  
離騷對揜關

除夕

梅花欲動意婆娑雪霰侵陵奈歲何呵凍笑供春帖子殘年  
清債已無多

題畫

綠樹敷陰翠荇香方舟十里下迴塘白鷗飛去青山暮落日  
唱歌煙水長

晚意

風吹白芷晚涼生乍試蘭湯尙不勝阿閣東頭新月上玉盃  
纖手自調冰

送錢元抑南歸口號二首

吳田百畝歲常荒家計蕭然只草堂  
卻有春眠濃似酒不將朝市博江鄉  
黃塵車轂不曾停白髮懷恩戀闕廷  
誰是東吳錢若水歸來雙鬢只青青

閒興

酒闌客散小堂空旋卷疏簾受晚風  
坐久忽驚涼影動一痕新月在梧桐

蓮房翠禽圖

錦雲零落楚江空翡翠翎邊夕照紅  
愁絕蘭橈煙水外秋香吹老一灘風

題畫

城中塵土三千丈何似兩翁麋鹿踪  
隔浦晚山供一笑離離

自映夕陽松

唐寅 九首

寅字子畏吳人弘治戊午舉人坐事下獄放歸有六

如居士集

顧璘國寶新編子畏坦夷疏曠漫負狂名著廣志賦  
暨連珠數十首跌宕融暢傾動羣類青谿倪公見之  
亟稱才子以故翰苑爭相引援驕妬互會竟媒禍胎  
棄落之餘益任放誕託興歌謠情體物務諧里耳  
罔辟俳文雖作者不尙其辭君子可以觀其度矣  
國史唯疑程敏政會闕發策用劉靜修退齋記爲問  
時罕知者徐經唐寅坐是得禍記具載劉因集中科  
場尙正大明白不炫奇辟程此問原措大氣禍傳爲  
都穆譖成  
藝苑厄言唐伯虎詩如乞兒唱蓮花落其少時亦復

玉樓金埒

堯山堂外紀伯虎嘗夢有人惠墨一囊龍劑千金出  
是詞翰繪素擅名一時因構夢墨亭晚年寫出常坐  
臨街一小樓唯乞畫者攜酒造之則酬暢竟日有言  
志詩云不煉金丹不坐禪不爲商賈不耕田常時寫  
就青山賣不使人間造藥錢  
四友齋叢說唐六如嘗作悵悵詞其詞曰悵悵莫怪  
少時年百丈游絲易惹牽何歲逢春不惆悵何處逢  
情不可憐金淚公案三生白骨禪老去思量應不悔  
兩袖黃金淚公案三生白骨禪老去思量應不悔  
衣持鉢院前此詩才情富麗亦何必減六朝人耶  
六硯齋二筆徵客徐弱水持看唐子畏白描鐵綫勾  
一人持杯對月坐脫巾露頂氣骨孤勁神采奕奕上  
題云烏臺十卷青蠅案炎海千程白髮臣人盡不堪  
公轉樂滿頭明月脫紗巾兒享日觀此詩意蓋贈一  
遷謫巨公者其徐天全之流乎竹懶曰不然必我坡  
翁

弇州山人四部稿伯虎才高自宋李營邱范寬李唐  
馬夏至勝國吳興王黃數大家靡不研解行筆極秀  
潤縝密而有韻度  
丹青志唐寅畫法沈鬱風骨奇峭刊落庸瑣務求濃  
厚連江疊嶂灑灑不窮信士流之雅作繪事之妙詣

評者謂其遠攻李唐足任偏師近交沈周可當半席  
王泰常集唐伯虎解元於畫無所不佳而尤工於美  
人在錢舜舉杜稷居之上蓋其生平風韻多也  
筆精唐伯虎疏狂玩世嵇阮之流也詩雖不甚雅馴  
而一段天然之趣自不可及如去日苦多休檢歷知  
音諒少莫修琴生涯畫筆兼詩筆蹤跡花船與酒船  
秋榜才名標第一春風絃管醉千場苦拈險韻邀僧  
和煖簾薰籠與妓烘皆自寫胸次非若組織套語者  
也  
清河書畫舫子畏畫做宋元無不臻妙而于李唐遺  
法尤得心印故其遇合作處往往負出藍之目  
山靜居畫論子畏畫原本劉李馬夏和以天倪資於  
書卷故法北宗者多作家面目獨子畏起而北宗畫  
法有雅格  
田按子畏詩才爛漫好爲俚句選家陶汰太過并其  
有才情者不錄此君真面不見子畏領解後以事下  
獄可謂不幸康熙間宋牧仲撫吳得嘉靖中蘇州太  
守胡纘宗題唐解元墓碑爲之重修墓道纘以短垣  
前築丙舍因子畏生平嘗自標置爲江左第一風流  
才子遂榜爲才子亭尤西堂有文紀之嘉慶辛酉子  
畏族裔仲冕來知吳縣重葺桃花庵過徵名輩題詠  
連篇累牘子畏身後庶不落窠臼已

短歌行

尊酒前陳欲舉不能感念疇昔氣結心冤日月悠悠我生告  
道民言無欺秉燭夜遊昏期在房蟋蟀登堂伐絲比簣庶永  
憂傷憂來如絲紛不可治綸山布谷欲出無岐頻頻若穴爕  
爕莫絕無言不疾鼠思泣血霜落飄飄鴉栖無巢毛羽單薄  
雌伏雄號緣子素纓洒埽中庭躑躑躅仰見華星來日苦  
少去日苦多民生安樂焉知其他

咏春江花月夜

歸月重輪三五夜玉人聯槩出靈幃內家近製河汾曲樂府  
新傳後鄧歌十里花香通綵殿萬枝燈燄照春波不關仙客  
饒芳思畫短歡長奈樂何

落花

春盡愁中與病中  
花枝遭雨又遭風  
鬢邊舊白添新白  
樹底深紅換淺紅  
刻漏已隨香篆了  
錢囊甘爲酒杯空  
向來行樂東城畔  
青草池塘亂活東

題畫二首

百尺松杉貼地青  
布衣衲衲髮星星  
空山寂寞人聲絕  
狼虎中間讀道經

秋水接天三萬頃  
晚山連樹一千重  
呼他小艇過湖去  
臥看斜陽江上峰

自畫韓熙載圖

衲衣乞食自行歌  
十院燒燈擁翠娥  
天下風流誰可並  
洛陽

雪裏鄭元和

酒費長苦欠經營預給餐錢費水衡多少如花後屏女燒金  
時遣耿先生

題畫二首

雲歛溪山秀色開滿溪新水綠于苔偶然一叟臨磯坐無數  
青山倒影來

山閣臨溪晚更佳繞崖秋樹集昏鴉何時再借西窗榻相對  
寒燈細品茶



明詩紀事

貴陽陳田輯



陶成一首

成字孟學寶應人成化辛卯舉人

圖繪寶鑑續纂孟學自號雲湖仙人畫山水多用青  
綠尤喜作鉤勒竹兔與鶴鹿皆妙  
無聲詩史孟學骯髒不羈有米南宮郭忠恕之風而  
豪蕩過之  
靜志居詩話雲湖寫人物山水最工子嘗從喬侍讀  
子靜處見之歎為絕品淩谿其女壻也計借入都雲  
湖語之曰聞張家灣某氏丁香花盛開子盍隨我觀  
乎淩谿云去禮部試僅三日公無往雲湖不許明日  
淩谿他避雲湖乘便與徑去醉主人家五日榜發淩  
谿中式比還鄉人醉錢賀淩谿雲湖於席上畫丁香  
一本尤妙絕洵曠達之士也

遊白雲觀

珠箔沈沈護曉霞  
人間何處有仙家  
紫簫吹上瑤臺月  
丹氣蒸開玉洞花  
一路和風回細草  
兩溪新漲浸平沙  
遊觀不盡登臨興  
引領天門步日斜

豐坊

六首

坊字存禮鄞人嘉靖癸未進士除禮部主事諫大禮受杖改南吏部主事謫通州判官以吏議免坐法竄吳中改名道生字人翁有南禺集

芝園定集南禺質稟靈奇才彰卓詭論事則談鋒橫出摘詞則藻撰立成九流百家罔不涉其津涯七步入又未足誇其捷麗士林擬之鳳毛藝苑方諸逸駟然而性不諧俗行或盤中片語合意輒出肺肝相啗匪趾藥噴卽援矛戟交刺亦或堪娛母爲婢娟斥蘭荃爲蕢菜旁若無人罕所顧忌知者以爲激詭不知

者以爲誕罔也繇是雖黃閭作轉相詆譏出有爭席  
之夫居無式閭之傲鵝衣藍縷濕突不炊童奴絕粒  
而遁亡賓客過門而不入竟頗領以終其身悲夫  
藝苑厄言豐道生詩如沙苑馬鬣駿相半恣情馳騁  
中多敗蹶

詹氏小辨南周外史爲人逸出法紀外而書學極博  
五體並能諸家自魏晉以及國朝靡不兼通規矩盡  
從手出蓋工於執筆者也以故其書大有腕力特神  
韻稍不足

書史會要豐坊草書自晉唐而來無今人一筆態度  
唯喜用枯筆乏風韻耳

孫鑛書畫跋跋余生平見南周草書甚多皆精勁有  
古法臨古帖尤妙唐元卿稱爲我朝第一

列朝詩集存禮高才博學下筆數千言立就於十三  
經皆別爲訓詁新索累每託名古本或外國本今

所傳石經大學子貢詩傳皆其僞誤也家藏古碑刻  
甚富臨摹亂眞爲人譏定法書以眞易贗不可窮詰

爲人狂誕傲僻縱口狗意所至人畏而惡之常要邑  
子沈嘉則具盛饌結忘年交相得甚驩或問之曰是

營姍笑公詩卽大怒設醺上章詛之上帝所詛凡三  
等一等皆公卿大夫有仇隙者二等則布衣文士嘉

則爲首三等則蠅蚊蚤虱其狂易可笑皆此類也

甬上耆舊集世廟議崇興獻禮人翁與父學士熙同  
哭諫受杖闕下學士既沒成所人翁復言其父前諫  
大禮非出本意因走京師上書請崇獻皇宜稱宗祀  
太廟相嵩主其議上從之然人翁竟不得錄用歸益  
自誕放詩深合古法雖時寫牢騷殊未盡其狂也  
田按南陽王書於時人中惟文徵仲祝枝山陸子淵  
稍見許可而於馬一龍沈愷王逢元陳鶴楊珂沈仕  
皆痛詆醜擬不遺餘力其評沈仕書云如夏四倚主  
夏四乃時相貴溪幹僕一時氣餒張甚其滑稽玩世  
類此余謂南陽以議禮背父附和時局悖甚然於永  
陵君也以視當時之趨承貴溪分宜者不稍愈乎詩  
亦激宕凌厲寫其牢騷不平之氣才人不得志大抵  
類此不足怪也

獨漉篇

上天陰陰雲多風疾風疾尙可雲多蔽日野狐哀鳴求匹于  
藪我欲殪之念其無友文彪微繫爪牙無施我心懷憤與之  
同悲魚潛淵不見其形悲歌躑躅孰知我情黃鳥翩翩在

彼江涯淩風一舉燕雀安知

雜詩

孤松挺穹壁下臨萬里波激湍嚙其根驚飈撼其柯紛紛穴  
赤蟻裊裊纏青蘿羣攻未云已生意當如何嚴霜一夕墜高  
標復嵯峨君子固窮節感慨成悲歌

病馬行贈少宰何燕泉

路傍病馬棄不收乃是天上眞驂駟君王立歎罷遠遊爾輩  
逸氣空橫秋憶昔山西戰爭起嫖姚手提三尺水夜半傳呼  
振鐵衣材官十萬同殊死此時銀鞍出塞行甲光一道如流  
星宵突重圍忽拉解晨馳厚陣皆奔崩歸來步向丹闕東圍  
人太僕俱動容卻疑房宿觸地裂百仞躍出悲泉龍茂陵蕭

蕭土花碧王良旣死誰復惜非關暫蹶損前功端爲一鳴終  
見斥陰陰高高入荒昏灑淚不到長安塵日落荒城鳥棲背  
天明野田霜滿身聞說胡窺白登道邊人被殺如刈草用爾  
豈無騰驤力冉冉年華坐垂老出門偶見令我哀買骨誰置  
千金臺試問天閑十二駟卽今未必非駑材

清明日

驟雨清明日繁花半欲飛流年兼病長客舍獨春歸東海稀  
魚雁西山富蒨薇何當出游衍長此謝陰霏

晚秋遣懷

身世真相棄清貧久自忘蒼苔緣破屋黃葉滿空牀飯借僧  
厨米燈分佛殿光猶餘五經笥一任蟄爲霜

己巳人日卽事

春霧蒙花柳春禽語屋檐絕糧長獨榻避世只空簾藥餌貧  
難致文章老更耽亦知玄覆瓿千載俟桓譚

王寵二十首

寵字履仁更字履吉吳人以諸生貢入太學有雅宜

山人集十卷

國寶新編王履吉清夷廉曠與物無競人擬之黃叔  
度詩辭刻尙風骨擺脫輕靡陶鈴李杜汰滌情文旣  
正體裁復減蹊徑可謂後來之高足惜乎天不假年  
進而未止學士觀其汗血可也行書疏秀出塵頗得  
晉法

胥壺集山人詩才力雄闊辭篇麗瞻去輕靡而就沈  
著尙鋪綴而略陶鎔又白雀諸篇興寄冲玄思調清  
逸遂窺陶謝之堂幾入王孟之室

甫田集王君風儀玉立舉止軒揭讀書石湖之上偃  
息長林豐草間含煙賦詩倚席而歌邈然有子載之

思

續吳先賢讚吳書學自宋克祝允明逮王寵皆名得魏晉法寵所爲詩與文徵明相若而格少尚之

藝苑卮言王履吉詩如鄉少年久遊都會風流詳雅而不盡脫本來面目又似揚州大宴雖雉珍水陸而時有宿味

四友齋叢說文衡山之後當以王雅宜爲第一蓋其書本於大令兼之人品高曠故神韻超絕迥出諸人之上雅宜詩清警絕倫無一點塵俗氣眞所謂天上謫仙人也所欠者沈著耳

六硯齋筆記王履吉不以畫名偶然興到隨筆點染深得大癡雲林墨外之趣可見高人胸中無所不能無聲詩史雅宜山人書法出入晉唐詩亦清新絕俗作畫仿黃子久蒼秀處不減徵仲膏自題云遠岸疏林斜日外春風碧水草堂前匡廬突兀開屏障坐看銀河一道懸

明詩選李舒章曰履吉風華煇煇自有駿骨陳卧子曰履吉中首山詩追蹤顏光祿

列朝詩集王履吉初學於蔡九達其後遊邊顧之間駁髮改轅而北

明詩別裁履吉圭臬頗謝痕迹未融然爾時吳中詩格以履吉爲最七言律亦頗沈鬱或者必以摹古短



之何也

田按履吉五古步趨顏謝亦時希踪左阮固是吳中俊特其贈邊太常詩云中州兩龍奮東轡一鳳摩傾倒李何與邊至矣牧齋北轅之論是履吉得力處不得以此訾議

### 還山作

恭承休明日九軌今一家進則縮龜玉退則蟄龍蛇吾道苟不虧安用事咄嗟山川日閒曠土風頗清嘉躡步陵絕峴流目玩歸霞鳴嚶靄以豫楊林蕙漸花風光枝上汎日采水中華感物眷彌結悟空理已遐永言詠玄寂聊以遣紛拏

### 過石公山

島嶼屢崩奔石林突參錯朝雲正吐秀冬水亦漸涸檜牙熊豹蹲蜷曲蛟龍蟄波濤激中洞嵐靄紛上薄金膏赤日流石

鏡青天鄴表靈徵名圖延賞諸幽諾蒼鼠不驚人丹楓時自落茲焉可投綸畢志甘場藿

入銷夏灣

千山翫迴轉雙闕開嶙峋圍作玉鏡潭流水桃花春雞犬自甲子衣冠乃秦民表裏重湖阻丹青四望勻孤風表日觀羣嶂摩天垠波光別駘蕩霞采相鮮新疑觴西王池誤攀織女津海鷗戲蘭蕕游鯈瑩心神牙檣悲昔年玉輦罷今巡榮華無常玩山水有天真塵纓聊以濯慚爾楫歌人

曲巖

乘雲歟先登攀崖紛廣眺孤峯上寒日平楚騰餘燒天高風物緊地迴山川竅儼臨仁陸梁哀鴻相叫嘯企石掛雲帆披

霞迎海嶠空水共汎瀾虛無自余照林深養谷神壁仄團景  
曜光風爛芰苓玉慙滋蘿薦樵隱自夷猶末路多奔峭懷哉  
由里公千春可同調

送錢太常元抑祠祭顯陵

江漢朝百靈絳節集鄢郢興國奠其陽虹蜺熠光景象設開  
天庭環衛森五嶺齋房產靈芝玉醴出金井神遊駕虛無劍  
舄存遺影灑埽祠官虔七鬯皇情耿太常典秩宗精白一心  
秉龍顏授玉冊殿上親祇領立端佩衝牙陟降瑤壇靜風清  
靈旗翻天赤御氣罔宗禋日輝光松柏載崇整山河扶棟梁  
虎旅肅藩屏還輶告成命弭節爲俄頃備聞古夔龍密布金  
華省彷彿弘治風廷論多骨鯁我輩飽藜藿散髮從箕穎

月夜登上方絕頂

乾坤一銀海萬境羣動滅狂殺王子歎疑是山陰雪披襟當  
雄風酒後覺耳熱山精忽夜嘯谷響崖竹裂愉悅非人間身  
世殊陡絕結束昇天行星斗爲珮玦倒窺山河影嗟峨鏡中  
列始知飛仙人五嶽視邱垤紫霧何濛濛入口皆玉屑幾時  
丹砂成白日翔鸞節

送陳子齡會試

夙昔卧林壑與子多緒言方軌共行遊遊彼竹素園古人不  
可作志節照當年垂爲日星文流爲河漢源中夜撫枕嘆思  
與比翼驚龍淵不在握壯志成煩寃日月忽我邁蒼葢甯久  
繁努力愛光景及子朝陽暉鳥飛不厭高獸挺各爭先策足

據要津慰我孤窮魂

分得滕王閣送盧駕部師陳

江漢紀南服衡廬奠朱方河山阻襟帶表裏望荆襄列雉鬱  
參錯樹羽蓋飛揚風清彭蠡瀨雲起昭邱陽帝子握龍節盤  
石荒楚疆中天抗瑤榭倒景垂虹梁鳴鑾謝千載遺構想靈  
光夫君勸王事流覽恣方羊霜淒百卉素日落千山蒼悼古  
志恟怛遭時氣騰驥北首報明主端笏拱嚴廊

渡江望金山

肅舫沂洪濤挂席展奇粵頗懷濟川人復羨臨濠樂茲山絕  
地脈江海秀磅礴突起無曼延中流自潏潏太華巨靈擘龍  
門神禹鑿嶮峭由代工位置非天作仰干斗牛精俯枕川藪

絡中虛醴靈潤外觀表封略樓宇盡齋騰嵐翠紛沃若潮音  
雜鐘梵人語怒蛟鱷余本水鄉士夙負滄洲諾一邱可棲遲  
萬事甘零落

飲顧淄川榮夫

昔掌淄川徭今耽竹林賞解龜豈年及乘興非外獎偶會禽  
尙心彌肆雲蘿想經始中園廬蘭橈陰閑敞清波過庭激紫  
蔓綠籬上葢芊抽薪萌抵蒲連宿莽差池喧鳥覆潏潏驚魚  
響息陰聊舉爵臨涯時抱杖英英白雲游纚纚鮮飈蕩興遠  
集蕭晨蘊眞愜吾黨蟬蛻迹已冥鸞翔意俱往方敦塵外交  
言稅區中鞅

古意

主父朝上書夕召甘泉宮公孫棄東海歛起如旋蓬王猛三  
秦豪賣香洛城東馬周起徒步驥首虬鬚公達人貴甕化一  
蛇而一龍碌碌不玉如落落非石同老氏得其真善應入無  
窮長嘯出鼎門高步躡華嵩儼遇王子喬攜手入雲中

天王寺竹林

雅志愛雲竹相看如故人玲瓏動風色瀟灑見天真枕簟開  
新夏鶯花追晚春欲將疏懶性一問遠公鄰

晚過竹院

竹院迷青靄祇園橫翠微松門晚霞抱雪壁秋花飛湖迴習  
池似臺荒吳苑非蒼蒼暝蘿合還趁漁樵歸

六月十日諸袁攜酒相過

堂上書生據槁梧一樽衰肺覺全蘇從知袁紹逃河朔更賞  
王戎戀酒壚涸轍難忘頻煦沫此身無賴祇江湖不妨久坐  
論肝腑紅燭淋漓清夜徂

湖夜

水月蒼蒼相蕩摩四天風起碎星河狂來直欲吞雲夢老去  
甯辭著芰荷綠酒藏眞時嘯傲青山作伴夜行歌金輿玉座  
千年事腸斷吳江東逝波

白龍洞

白龍卧巖洞霧雨長冥冥或化白衣老空山來聽經

春盡

榮華夢想今何在江湖飄零未有涯可惜少年留不得東風



二十五回花

古泉新霽對丹楓作

紙窗斐几竹間房  
一樹丹楓倚夕陽  
啜盡茶甌猶不去  
野人偏自戀秋光

看杏花

宿雨初收麗晚霞  
江煙澹澹薄籠紗  
山家翠壁圍春色  
野客敲門看杏花

白雀返棹李王二子送余過虞山下作

芙蓉疊壁錯奇錦  
琉璃千頃搖青空  
把酒掀簾一長嘯  
真堪狂殺米南宮

明史紀事

貴陽陳田輯

丁鑑

祝允明 五首

允明字希哲長洲人弘治壬子舉人除興甯知縣遷  
應天通判有祝氏集略三十卷又有金縷醉紅窺簾

暢哉擲果拂絃期期等集

國寶新編希哲超類絕人讀書過目成誦鉅細精粗  
成壯腹苛有觸斯應無間假鄙書學精工自急就以  
逮虞趙上下數千年綫體罔不得其結構若義獻真  
行懷素狂草尤臻妙筆本朝書品不知合置誰左  
續吳先賢讚允明生五歲能書過目即誦爲詩時有  
壯語書法得魏晉人髓  
藝苑卮言祝希哲詩如盲賈人張肆頗有珍玩位置  
總雜不堪惜法自元常二王永師祕監率更河南吳

吳趨

興狂素顛旭北海眉山豫章襄陽靡不臨寫工絕晚  
節變化出入不可端倪風骨爛漫天眞縱逸直足上  
配吳興他徵明曰吾鄉前輩書家稱武功伯徐公次  
珊明網文卿李公李楷法師歐顏而徐公草書出於  
爲太僕少卿李公李楷功外孫太僕之婿也早歲楷筆精  
顛素枝山先生武功外孫太僕之婿也早歲楷筆精  
謹實師婦翁而草法奔放出於外大父蓋兼二父之  
美而自成一家者  
客臺集枝指山人書如絲裏鍼如印印泥  
王樹虛舟題跋平生見祝京兆書凡數十百卷莫有  
同者蓋書到熟來無心於變自然觸手盡變者也吾  
嘗論有明一代書法祝京兆變化不拘董宗伯天才  
超軼二公於三百年來足可籠罩  
翁方綱復初齋集今日書家皆知祝書小楷勝其大  
草然予見其行書合歐褚爲一手直追晉法不易幾  
也王虛舟乃譏枝山骨韻未清殆僅見其贗蹟歟  
田按枝指生言情之作頗有麗藻不盡合轍書法深  
得古人神髓有口號云枝山老子餐蒼浪萬事遺來  
利得狂從此日和先友對十年漢晉十年唐可以知  
其攻苦矣

閭闔紅樓起，皋橋淥水迴。  
綺羅搖日麗，車馬逐雲來。  
施旦非吳豔，機雲是晉才。  
欲歌遺古調，風俗轉堪哀。

春陽曲

錢唐蘇小小，京洛董嬌嬌。  
穠芳競桃李，清潤並瓊瑤。  
頽山左右倚，因風上下飄。  
東鄰不姓宋，無恡一相邀。

春遊虎邱

春光滿郊野，吾獨愛西邱。  
碧水一池定，白雲千頃流。  
散人歌小海，幼伎撥箏篴。  
遠著謝公屐，高登王粲樓。  
人生一杯酒，又是一年遊。

贈承公

牆外西林是寶坊，林間高臥有支郎。  
定回斜日雲穿衲，吟斷

寒更月滿牀。妙梵遠通潮。隱隱清修分。與柏蒼蒼何時爲。取  
無生話。共了趺蒲一夜長。

武帝傳

柞宮憑几畫成王。淚落銅仙月似霜。王母不來方朔死。茂陵  
松柏自斜陽。

陸深 六首

深字子淵。上海人。弘治乙丑進士。改庶吉士。授編修。  
歷司業。祭酒。請延平同知。遷山西提學副使。改浙江。  
歷江西參政。四川布政使。召拜光祿卿。改太常兼侍  
讀。學士。進詹事。贈禮部侍郎。諡文裕。有儼山集一百  
卷續集十卷。

唐錦龍江集國初吾松多以書學名天下久已絕響  
公近奮起遂凌躐前人而處其上識者謂趙文敏後  
一人非談詞也

藝苑卮言陸子淵詩如入貴官作文語雅步雖自有

餘未脫本來面目

詞林人物考子淵字學比於趙松雪每過同舍見鬆

几輒縱筆塗寫旁苦無人品陶古今商確事理賞析

文義辨識書畫古品談鋒洒然一座盡傾

莫是龍石秀齋集陸文裕自言吾與吳興同師北海

海內人以吾爲取法於趙究論其風力實出吳興之

上明詩選陳臥子曰子淵氣尚清拔學非深造

田按子淵論詩云近時李獻吉何仲默最工姑自其

近體論之似落人格套雖謂之擬作可也然其自作

乃平衍敷腴去李何尙遠書法在明人中不失爲第

二流

### 春山辭贈別何舍人仲默

登長坂望故都辭帝閭兮南驚渡河梁兮春波時一去兮難

再怨芳歲兮蹉跎赴山靈兮夙約返初服兮芒羅林深兮春

卷十二  
三  
暮草靡兮雲和，猿避席兮空谷。樹開障兮崇阿，左蘭兮右芷。  
牽芙蓉兮蟠蘿，聊徜徉兮寤歎。澹容與兮嘯歌，望佳人兮不  
可卽。眇千里兮傷如何。

徐州洪次韻

表裏山河勝，東泉復上流。斜陽明石佛，古堞遶徐州。谿影尤  
宜月，潮聲不待秋。去來風雨橫，奇絕冠茲遊。

劉蕡祠

諫議千年自有祠，唐朝宮闕黍離離。多情瘦馬衝寒到，無數  
青山落照遲。往事空傳臺下駿，靈風常滿廟中旗。冰霜入夜  
頻搔首，欲奠芳椒侑楚詞。

清明出行阡邱

病來廿日始勝冠花柳清明滿畫闌  
二月光陰半晴雨百年塵世幾悲歡  
王孫芳草連天碧燕子東風作陣寒  
萬事山頭一坏土麒麟留得後人看

素履齋

新裁紙帳木棉裘曲几圍屏事事幽  
明月射窗殘雪霽夜深人在水晶樓

王兵憲于澤以二力士送予遣還

紅袍白面好兒郎燕趙豪華獨擅場  
贈汝長纓三百尺樓閣西去縛名王

黃雲 五首

雲字應龍崑山人以貢授瑞州訓導有丹巖集十卷



蘇州志黃雲文宗坡老書法山谷

靜志居詩話丹巖詩雖未純然勝林屋十倍

田按應龍與沈石田爲素交有奇石川求畫詩云五

日十日畫水石經旬亦可成一幅我求君畫故作難

三四年過將五六人來莫怪數附書譬諸能掌吾所

欲擬乘龍子促迫之又恐收書到城隍題詩再拜致

執事煩君開緘一寓目忽焉爲我發新興湖上草堂

風滿竹三茅二華入手筆辭嶸之頂空洞腹經營意

匠忽貌成爛逸天眞洗凡俗厚予之嗜亦多矣豈止

三月不知肉若令烏有先生來只向江山寄遐矚語

頗滑稽亦嘗鑒別收藏有宋思陵勅岳飛殺賊手詔

爲祛簾者撰去石田寄詩云思陵西此翰破水勅飛

往矯害證逆擒滔天信欺罔此紙後不傳何以暴所

枉鋼子秘密藏何爲世標榜天意流無方假盜理可

想使之一人傳所見目爲兩盜去轉相售售萬日

賞存未爲子欣失未爲子憐慰子不平懷詩當發浩

蕩

日夕

寂居山之阿木葉明返照陰厓凝晚色餘霞尙鮮耀遠心望

煙海孤興凌仙嶠歸牧驅牛馬溪船罷魚釣閉門羣動息默  
以領眾妙

雨中書事

病裏仍愁四十過學書學劍兩蹉跎白翻野飯炊粳稻綠染  
秋衣製芰荷遠道西風吹客鬢空江暮雨溼漁蓑村醪急辦  
青錢買兒女燈前且笑歌

題春草圖

野燒痕回一雨過村童放牧散平坡  
鴈洲畔埋愁遠建業城邊積恨多  
誰見夜深嘶石馬但愁歲久沒銅駝  
江淹賦別魂銷處春水年年自綠波

題雲林畫二首

過雨山如罨畫明溪聲直到白雲亭雲遮不斷溪聲去流出  
平蕪兩岸青

白髮雲林老畫師一生辛苦竟誰知何須更上峰頭望滿目  
清秋滿目詩

蔡羽 九首

羽字九達吳人以太學生除南翰林孔目有林屋集

二十卷南館集十三卷

甫田集九達詩晚更沈著時出奇麗

藝苑卮言蔡九達詩如灌莽中薔薇汀際小鳥時復

娟然一覽而已

國雅九達整秀

太湖備考陶周望云余幾年讀蔡羽洞庭記知有是

山又以茲山知羽後四年始至山中急欲就鄉人問

羽天王寺僧澄源者好事知文墨爲余言山有東西  
蔡村族最盛而羽怪誕有三間齋已處其中薔薇爲

人令腰膝俱可屈曲朝課易夕謀四書自爲解而置  
傳注几旁每開卷便大詬曰某甲謬甚叱童子牽藥  
人來踞而杖之而置大鏡南面遇著書得意輒正衣  
冠北面向鏡拜稽其影曰易洞先生爾言何妙吾今  
拜先生矣羽尤以善易自負故稱易洞也  
六視齋筆記蔡林屋行押書迺與有逸韻  
田接羽妄自矜詡解經薄古人談詩文則卑韓杜如  
周望所云抑何可笑竹垞謂羽集詩賦八百餘首文  
二百餘首恆河之沙鉤金安在詆之亦過余爲採掇  
菁華亦是六朝人佳製

宴韓子承宗葑溪草堂與劉時服

中丞高館舊公子翠屏開曲水當門轉飛梁夾樹來花枝盡  
吐豔水氣煖生苔樂意關啼鳥閒情付酒杯醉來白幘岸時  
傍碧溪回夢得新能賦雲霞費剪裁

贈金子坤

別子蘭蛻花相逢竹生籜閒門風自開虛徑雲常鑰已煩揮

塵談未慙聽猿酌爲埽南山石秋眠看泉落

從新河至楓橋次李氏

垂虹一十餘滄洲次第厯波盪綺閣簾風送樓船笛萍迴開  
明鏡渚細淹去鷁出入山水間漸覺塵土滌寵少憂亦輕形  
神獲雙寂

虎山橋

初出山腹中復見水行處逶迤得平壩蒼茫急回顧山梁不  
爲高延攬自成趣風條薄林翠珍木接葉香前葩未及瘁後  
萼重競芳朝遊屢過煙霞石夜宿曾投松柏房從來不識銅  
坑面今日青青落吾掌上崦何明媚下崦亦清朗楊花飛飛  
青錦陂荇葉差差木蘭槳前帆乍滅後榜興長川引領雲憑

憑游絲亂起煖氣昏須臾不見西華村東風吹亂鴻濤羣水  
西顏色何紛紛繫馬芳祠忘夕暝

覆舟山臨望

覆舟山頭霽景明長松落落崖石平迴巒秀嶺低復昂傳聞  
此地爲臺城南望建章宮佳氣何鬱葱秦淮樹中流遙與宮  
門通城中萬井如棋畫楊柳煙中分紫陌內園蘭桂浮溫香  
戚里池臺蕩朱碧鳳凰樓閣無處尋臨春結綺作梵林樽前  
卻是樂遊苑市朝更改成古今登臨易頭白銜杯落江日回  
望北湖煙蟬鳴樹蕭瑟秋波慘淡荷菱花玉鳧錦雞踏浪霞  
西曹已鳴馬東署復報衙冥冥湖底月寂寂城頭鴉停琴送  
盡飛鴻影引領天邊不見家

送張西谷

茂先偏博物顧我意殊深客倦辭梁苑秋悲復楚吟空江明月棹高興碧雲岑別後魚牋早無令霜滿林

龍江驛曉發

朱門欲開猶未開煙花已簇鳳凰臺龍江棹歌天上去魚鳧春色鏡中來星流寶匣青霜劍柳拂長亭綠酒杯白狗赤雞何處去王孫原上起塵埃

吳門

錦帆寂寞鴛湖非山色含顰自落暉莫道千秋無勝事白鷗猶拂畫欄飛

陸包山述李三塘見推爲題畫

披展雲山話雨中士龍人品李膺風荊州士論虛叨忝借筆  
題詩看洗桐

張靈一首

靈字夢晉吳人

丹青志張夢晉與唐寅氣志雅合又俱善畫夢晉人  
物冠服玄古形色清真無卑庸之氣山水筆生墨動  
斬然絕塵  
姑蘇名賢小志夢晉能畫人物高遠有致然惟掩其  
醉得之真可闕取  
山靜居畫論張夢晉風流蘊藉子畏流輩筆法妍雅  
亦娣姒間耳  
存餘堂詩話夢晉吳中名士早歲功名未偶落魄不  
羈寄情詩酒間臨終之前三日作詩云一枚蟬蛻榻  
當中命也難辭付太空垂死尚思玄墓麓滿山寒雪  
一林松可以想見其風致

對酒



隱隱江城玉漏催  
勸君須盡掌中杯  
高樓明月笙歌夜  
知是人生第幾回

靜志居詩話夢晉狂生遊枝指生之門其畫山水足  
亞伯虎對酒一詩可稱絕唱

雷鯉五首

鯉字惟化自號半窗山人建安人

無聲詩史半窗善畫山水人物篆隸道勁  
田按半窗畫流傳甚少詩特風致翩翩

題畫五首

竹外是誰家  
茆屋桃花裏  
問春春不知  
閒行過流水

鳥外風煙古寺迴  
半帆倒挂夕陽來  
江天物色無人管  
處處野棠花自開

竹杖芒鞋一徑深  
山橋晴漲瀉松陰  
隔江亭子是何處  
紅葉

白雲秋滿林

朔雪江天草樹寒  
小齋日日倚清酣  
牀頭酒盡無人到  
吟對梅花只自看

滄江碧浪飛紅葉  
峭壁孤峰倚斷雲  
一舸圖書兩詩客  
海天秋思屬平分

史忠一首

忠字端本一字廷直號癡翁上元人

金陵瑣事史癡山水人物自寫胸中逸氣不可以畫之常格求之

畫史會要癡道人善畫似方方壺長於雲山圖瀟瀟不羣

田按癡翁築臥癡樓近冶城引客談笑呼盧其中酒酣擲管爲新聲樂府略不構思或五六十曲或百曲同時陳大聲徐子仁皆自以爲弗如畫山水樹石縱筆揮寫嘗訪沈石田於吳門沈他出堂有素絹潑墨

成山水巨幅不通名姓而去石田曰必金陵史癡也  
要之歸留三月而別石田至金陵亦館臥癡樓為作  
像贊曰玩世滑稽風韻月癡灑筆淋漓水走山飛癡  
喜曰石田翁為我寫真也有妾何氏名玉仙號白雲  
道人能篆書小畫解音律癡求兩京絕手琵琶張祿  
授以南北曲自度新詞被之有詩紀事云忽雷曾說  
鄭中丞不似女郎樓上聽此日白雲推卻處癡翁清  
賞倚雲屏女笄當嫁壻家貧不能具禮詭辭攜女觀  
燈與其婦送之壻家大噪而去與赤松山農金琮為  
素交盛時泰合編二人詩題曰金陵二隱稿未授梓  
煨於火敢禱問翁裔孫志英更輯癡翁遺集今亦不  
可得也

題畫

雨晴江館洞雲歸桑落人家半掩扉好是痴翁真不俗揮毫  
便作米元暉

陳鐸一首

鐸字大聲下邳人推輅伯文之曾孫世襲指揮家南

京有秋碧軒雪香亭稿

野獲編今傳誦南曲如東風轉歲華云是元人高則誠不知乃陳大聲與徐崑仙聯句也今人但知陳大聲南湖之工耳其北一枝花天空碧水澄全套與馬致遠百歲光陰皆咏秋景真堪伯仲又題情新水令碧桃花外一聲鐘全套亦脍麗不減元人本朝詞手似無勝之者

帝里明代人文賂黃錦衣琳字美之家有富文堂一歲元宵大集聲樂九峰徐君秋碧陳君稱上客美之曰今日佳會舊詞非所用也請二公聯句卽命工度諸絃索何如二公揮翰甫畢一調卽命工者肄之既合成而奏之一時交傳以爲元宵勝事

金陵瑣事陳指揮大聲齋居云晚樹低分簫春雲淡隔城夜往新豐鄉云山月巧窺人影瘦夜深先向客衣生

無聲詩史陳大聲山水仿沈啟南繪一幀送史廷臣自題絕句云情深此日難爲別相送元方又季方萬里楚江孤棹迴穩吟秋色到維揚

次與仲和聯句韻

臥病經年喜遇君  
草堂清話到斜曛  
濁醪拚取樽前醉  
險韻何妨席上分  
冷雨小蛩鳴切切  
輕風殘葉下紛紛  
也知別後還相憶  
何處鐘聲隔暮雲

徐霖二首

霖字子仁吳人徙南京補諸生坐事削籍武宗南狩  
召見欲官之固辭賜飛魚服扈從還京後歸里有麗

藻堂稿

金陵瑣事徐霖少年數遊狹斜所填南北詞大有才  
情語語入律吳中文徵仲題畫寄有句云樂府新傳  
桃葉渡彩毫遍寫薛濤箋迺實錄也武宗南狩伶人  
臧賢薦之於上召命禁直霖作詩紀之云封禪無書  
何獻納清平有調幸遭逢及放歸作詩云放歸吾願  
遂計日便還鄉免上乞骸疏將求辟穀方無心判恩  
怨有道管行藏耿耿思君念他生亦不忘  
帝里明代人物略九峰徐子仁聚爽迭宕開快圖武

定橋東中有翠篠清池芳林幽砌臺曰振衣刻名公  
題詠下有麗藻堂喬伯岩書晚靜閣文衡山書風流  
順達一時豪貴悉禮下之武宗南狩幸其晚靜閣釣  
魚得金鯉又失足落池中今園有宸章堂浴龍池紀  
其實也

藝苑卮言徐霖好堆墨書神采爛然

名山藏子仁篆登神品眞行皆入精妙碑板書師顏  
柳題榜大書卽詹孟舉並絕海內武宗兩幸其宅子  
仁故長髯武宗手剪之以爲拂子因自號髯翁  
畫史會要徐髯仙雖不以丹青名所畫松竹花草蕉  
石皆精雅可愛  
無聲詩史子仁工詞翰旁及篆書并山水花卉無不  
臻妙

### 昭慶寺

寺內尋幽勝躋攀興轉豪空廊廡壁暗古殿戒壇高神味誰  
眞悟形骸自作勞無文來發願雙鬢愧刁騷

### 桐城歸舟漫興

老翁七十未偷閒  
浩淼江城去復還  
覽鏡愧難留黑髮  
當杯狂欲醉青山  
仰窺鵬鸞雲霄上  
近狎鳬鷖洲渚間  
誰謂衰年全省事  
獨於詩興不曾慳

郭詡一首

詡字仁宏泰和人

名山藏郭詡自號清狂少從事學官弟子業去而極其能於畫遍歷名山曰豈必譜也畫在是矣同時江夏吳偉北海杜堇姑蘇沈周俱以畫名莫不延頸願交天下競傳清狂畫購之百金畫史會要清狂道人肆意手摹即成山水畫已題詩其上間作辟穀抱膝等圖題云仰看青天小於席茫茫萬古如一日世間無處可逃名走入龍宮學吹笛

題畫

流落人間四十年  
并無人識是神仙  
天涯海角無多地  
只借

洪厓一夜眠

景卿一首

卿字夢弼南京人

金陵瑣事景卿善小景花草

題自寫杏花

晴園紅粉護春煙彷彿江村二月天記得踏青回首處一枝

斜拂酒樓前

高澱一首

澱字宗呂侯官人有石門集六卷

閩畫記高澱工山水花卉人物翎毛用墨濃潤運筆

古雅出入宋元四大家各造其妙

微蹟入編侯官高澱號霞居子善隸草八分詩畫皆

逸品登岳陽樓云殘雨數峰衡嶽曉暮雲孤樹洞庭



丁鑑卷十二  
秋亦有畫意

羅山月下遣興

石門道人真好奇  
角巾野服駭羣兒  
慣隨白鳥行偏健  
貪看青山坐不辭  
世短每憐長伏枕  
家貧猶自苦吟詩  
杖藜來往羅山月  
此意惟應野老知